



## Faasnacht 2018

Wenn ych vo däm No-Billag ghöör, dänk ich an Berlusconi.  
Ych mälich nur mit Sound im Stall. Exgüüsi, s goht nid ohni.  
No-Billag isch e groossi Gfohr für jeede Schwyzer Buur.  
Wenn s nur no Radio Blocher git, wird d Milch ganz sicher suur.

Y ha my Schüüre gmischtet und unter em Druckfass unde  
vo mym Uurgroosvatter e son e alte Göppel gfunde.  
Y schänk daas Velo em Wessels und erkläär em daas esoo:  
Dä Göppel cha au nümme schalte, dr Rücktritt söt no goo!

Dass d Faasnacht Wältkultureerb isch, han ych mit Stuune vernoo.  
Was son e Erb bedüte sell, bin y nid ganz nooche choo.  
Y schryyb drum dr Unesco e Brief und täil ganz hööflig mit:  
S Baaselbiet stoht gärn parat, wenn s öppis z eerbe git!

Dr Dokter Federer säit zu mir: Du hesch e Schwellig an de Mandle.  
Die muesch dr im e Fitnesszenter therapeutisch loo behandle.  
Griegsch Fieber, drzue no Brächräiz, pass uf, denn säit me däm,  
wenn d au no Durchfall überchunnsch: e klassische Grand Slam.

Dr Polo Hofer nimmt s letschte Tram diräkt an Lauenensee.  
Döört git s Whisky, e Huffe Graas und käini Gränze meh.  
Au doo fahrt s Trämli gränzeloos noch Weil und St. Louis  
und mit Drääne i de Ouge stirbt d Innerstadt ganz lyys.

Bisch e Männli oder e Wyybli, oder mäinsch du bisch doch ender  
so öppis zwüscheduure, däm säit me glaub Transgender.  
Froogsch, ob die e äiges Hüüsli bruuche, säg ych numme troch:  
Z Buckte pfunde mr alli zäame ins glyyche Gülleloch.

Barcelona will wäg vo Espania, si wäi un Separación.  
Madrid isch doo drgeege und macht uf Konfrontación.  
Wenn Lieschtel mit Baasel Lampe het, denn git s als Solución  
zum sich wiider gäärn haa una Hospital-Fusión!

Dummi Chue darfsch nümme sääge, kritisch isch au blöödi Gäiss.  
Doofi Gans isch voll dernäabe, gschupfts Huen isch mee als häiss.  
Säisch häissi Chatz oder gäili Sau, chasch dr s Läabe voll versaue:  
Drum sääg y im Stall jetzt numme no: Guete Moorge liebi Fraue.

Moorechopf darfsch au nümme sääge. Gfööhrlich isch Mäitlibäi.  
Frauefuurz syg voll sexistisch. – Die Probleme wo mir hüt häi!  
Irgendwann verbietet mr sicher non e son e fruschtrierti Chräie  
zum Kaffi am Sunntignoomidaag myni Zwätschgewäie.

Euse Lukas Ott isch nümme z Lieschtel Stedtli-Präsident.  
Är isch jetz Baasler Stadtentwickler im Präsidialdepartemänt.  
Wenn Baasel sich entwickle wott, lyt em Heiri spotte fäärn.  
Entwickligshilf isch guet und wichtig: S Baaselbiet hilft gäärn!

Dr Federer wird Dokter HC, daas macht mi schampaar stolz.  
E wältberiemte Ehredokter us Baaselbieter Holz.  
Daas ych daas nie erräiche wird, duet mir zwaar scho chly weh.  
Vellicht längt s mr zum Ehrerammel vom Faasnachtscomité.

In de Bäarge het s e Huffe Schnee. D Laawiinegfohr isch gross.  
Zu allem Eeländ fliegt jetz no dr Donald uf Davos.  
Dr Trump wird sääge: Dasch dr Bewyys, dass d Temperature gheie.  
Look around you, even here in Swaziland duets schneie!

S Tattoo macht jetz käi Gwünn me, s macht sogar hindenaabe.  
Schyynt s häigi s zvyyl so Tanzmaryyli und au zvyyl Sängernnaabe.  
Me welli mee so Drums and Pipes mit Schotterrock um d Nuudle.  
Frooget doch dr Bundesroot: Daas sy au so Säck wo Duudle.

Dä Buttet isch e Walliser, drum het er halt gäärn Wysse.  
Drzue liebt er au d Fraue, obwohl die mänggisch bysse.  
Är chaa nid verstoo, dass es Fraue git, wo sich döi beklage.  
Y ha nur welle stryngle. Dr Constantin hät gschlaage.

D Empöörig die isch riisegroos: Zwöihundert Millione  
zaale die Pariser für die Neymar-Schuttkanoone.  
D Läischtig bestimmt halt doo dr Bryys, daas macht mii nid schyysig.  
D Frau Pegoraro gäbte mr euch für e Franke fünfedryssig!

Wenn ych e Säuli metzge, denn mach y daas diskreet.  
Ych mach e käi so Metzgershow, wo jeede alles gseht.  
Technisch schaff ych sehr präzyys, y wäiss wie me filetiert.  
Jä, ich hät gwüsst wie me deene z Bärn s Härzstück präsentiert.

